

悲華經卷第十

及十

北涼天竺三藏法師曇無讖譯

檀波羅蜜品第五之三

佛告寂意菩薩善男子其後復過無量無邊

阿僧祇劫此界轉名選擇諸惡爾時大劫名

及十

善等益世亦五濁東方去此五十四天下彼

閻浮提名盧婆羅以願力故生於彼中作轉

輪聖王主四天下號虛空淨教諸衆生安住

十善及三乘中我於爾時布施一切無所分

別是時多有無量乞兒來從我乞種種珍寶

金銀瑠璃瓊錢貨青瑠璃珠大青瑠璃火

珠摩尼所有珍寶少不足言乞者無量我於

是時即問大臣如是珍寶從何處生大臣答

言是諸龍王之所示現雖有此寶唯供聖王

不能廣及如是乞者我於爾時作大誓願若

我未來於五濁中厚重煩惱人壽百歲必定  
成阿耨多羅三藐三菩提所願成就得已利  
者作大龍王示現種種珍寶之藏於此選擇  
諸惡世界在在處處四天下中於一一天下  
七反受身一一身中示現無量百千萬億那  
由他等珍寶之藏一一寶藏縱廣正等一千  
由旬各各充滿種種珍寶如上所說給施衆  
生如我在此一世界中精勤用意如是次第  
徧十方如恒河沙等五濁惡世無佛國土於  
一一佛土一一天下七反受身乃至如上所  
說善男子我作如是善願爾時天人有百千  
億在虛空中雨種種華而讚我言善哉善哉  
一切布施汝今已得如心所願善男子爾時  
大衆聞虛空淨王諸天作字號一切施闡是  
事已各各相謂我等今者應往乞求難捨之

物若能捨者可得名為一切布施如其不能  
何得稱為一切施也是時諸人各各從王乞  
索後宮夫人嫫女及兒息等時轉輪王聞是  
事已心大歡喜隨其所索悉皆與之是時諸  
人復更相謂言如是妻子皆是易捨非難事  
也今當從王乞身支節若能捨者真可得名  
能捨一切爾時諸人往大王所於是眾中有  
一乞兒字青光明受持狗戒向轉輪王作如  
是言大王若是一切施者唯願施我此閻浮  
提我時聞已心大歡喜尋以香水洗浴其人  
令著柔軟上妙衣服以水灌頂紹聖王位持  
閻浮提即以施之復作是願如我以此閻浮  
提施是因緣故成阿耨多羅三藐三菩提所  
願成就得已利者是閻浮提所有人民皆當  
承順奉敬此人以為王者復令此人壽命無

量作轉輪王我成阿耨多羅三藐三菩提已  
當與授記一生當得補佛之處有婆羅門名  
曰盧志復來從我乞索兩足我聞是已心生  
歡喜即持利刀自斷二足持以施之施已發  
願願我來世具足當得無上戒足有婆羅門

名曰互復來從我乞索二目我聞是已心生  
歡喜即挑二目持以與之施已發願願我來  
世當得具足無上五眼未久之間有婆羅門  
名淨堅牢復來從我乞索二耳我聞是已心  
生歡喜尋自割耳持以施之施已發願願我  
來世當得具足無上智耳未久之間有尼乾  
子名想復來從我乞索男根我聞是已心生  
歡喜尋自割取持以施之施已發願願我來  
世成阿耨多羅三藐三菩提得馬王藏相未  
久之間復有人來從我乞索身之血肉我聞

是已心生歡喜即便施之施已發願願我來世具足無上金色之相未久之間有婆羅門名曰蜜味復來從我求索二手我聞是已心生歡喜右手持刀尋斷左手作如是言今此右手不能自割卿自取之作是施已復發願言願我來世具足當得無上信手善男子我截如是諸支節已其身血流復作願言因此施故必定成阿耨多羅三藐三菩提所願成就得已利者其餘身分更得受者爾時非聖不知恩義諸小王等及諸大臣皆作是言咄哉愚人如何自割身體支節令諸自在一旦喪滅其餘肉搏復何所直是時大臣即持我身送著城外曠野塚間各還所止時有無量蚊虻蠅等唼食我血狐狼野干鷗鷺之屬悉來噉肉我於爾時命未斷間心生歡喜復作

願言如我捨於一切自在及諸支節乃至一念不生瞋恚及悔恨心若我所願成就得已利者當令此身作大肉山有諸飲血噉肉眾生悉來至此隨意飲噉作是願已尋有眾生悉來食噉本願力故其身轉大高千由旬縱廣正等五百由旬滿千歲中以此血肉給施眾生我於爾時所捨舌根令諸虎狼鷄鶩鷲鷲食之飽足以願力故復生如本假當聚集如耆闍崛山作是施已復作是願願我來世具足得成廣長舌相善男子我時命終在閻浮提以本願故生於龍中作大龍王名示現寶藏即於生夜示現百千億那由他種種寶藏自宣令言是地分中多有寶藏其中具足諸珍異物金銀乃至摩尼寶珠是諸眾生聞是唱已各各自恣取諸寶物隨意所用用已

具足行十善道發阿耨多羅三藐三菩提心  
或發聲聞辟支佛心我於爾時在龍王中七  
反受身壽命七萬七千億那由他百千歲示  
現無量無邊阿僧祇寶藏與諸衆生爾時安  
止無量無邊阿僧祇人於三乘中勸令具足  
行十善道以種種無量珍寶滿衆生已復發  
願言願我來世具足當得三十二相如是第  
二天下亦復七生作大龍王乃至徧滿選擇  
世界在在處處諸四天下悉作如是無量利  
益乃至十方無量無邊無佛世界一一世界  
一一天下亦復七生作大龍王壽命七萬七  
千億那由他百千歲示現如是無量無邊阿  
僧祇寶藏亦復如是善男子汝今當知是謂  
如來爲菩薩時深重精進求三十二相之因  
緣也善男子如來爲菩薩時所行精進除上

八人過去世中更無能及若過去無者當知  
未來諸菩薩等亦復不能如是勤行深重精  
進如我所行善男子復過無量無邊阿僧祇  
劫此界轉名珊瑚池劫名華手是時無佛其  
世五濁我於是中作釋提桓因名善日光明  
觀閻浮提見諸衆生轉行惡法我時即化爲  
夜叉像其形可畏下閻浮提住諸人前諸人  
見我皆生怖畏而問我言欲何所須願速說  
之我時答言唯須飲食更無所須其人復問  
欲食何等我復答言唯欲殺人噉其血肉汝  
等若能盡其形壽持不殺戒乃至正見發阿  
耨多羅三藐三菩提心若發聲聞緣覺心者  
我則不復食噉汝等善男子我於爾時常作  
化人以供食飲爾時衆生見我如是倍生怖  
畏悉皆盡形受不殺戒乃至正見或發阿耨

多羅三藐三菩提心或發聲聞辟支佛心我  
勸如是閻浮提內一切衆生修行十善住三  
乘已復作誓願若我必成阿耨多羅三藐三  
菩提所願成就得已利者復當勸此四天下  
人令行十善道乃至徧滿此之世界在在處  
處四天下中以如是相貌令諸衆生行十善  
道勸化發於三乘之心如是徧滿一世界已  
乃至十方無量無邊阿僧祇等五濁惡世無  
佛國土亦復如是善男子我於爾時發是願  
已一切成就於珊瑚池世界化作可畏夜叉  
之像調伏衆生令住十善及三乘中如是徧  
於十方無量無邊阿僧祇等五濁惡世無佛  
國土作夜叉像調伏衆生令行十善住三乘  
中我於往昔恐怖衆生令行十善住三乘中  
以是業因緣故令得坐於菩提樹下欲成阿

耨多羅三藐三菩提時天魔波旬與諸大衆  
來至我所欲得壞亂我菩提道善男子略說  
我爲菩薩之時檀波羅蜜善男子諸大菩薩  
甚深法忍微妙總持解脫三昧我於爾時悉  
未得之唯除二身有漏五通我於爾時作此  
大事令無量無邊阿僧祇人安止住於阿耨  
多羅三藐三菩提無量無邊阿僧祇人安止  
住於辟支佛乘無量無邊阿僧祇人安止住  
於聲聞乘中況復兼得供養諸佛如一佛世  
界微塵數等一一佛邊所得功德數如大海  
諸水滴等供養無量聲聞緣覺師長父母五  
通神仙亦復如是如我昔者爲菩薩時自以  
血肉供給衆生如是大悲今諸羅漢悉無是  
心

入定三昧門品第六

爾時佛告寂意菩薩摩訶薩言善男子如我  
今者以佛眼見十方世界如一佛土微塵等  
諸佛世尊般涅槃者悉是我昔之所勸化初  
發阿耨多羅三藐三菩提心行檀波羅蜜乃  
至般若波羅蜜者未來之世亦復如是善男  
子我今見此東方世界無量無邊阿僧祇等  
諸佛世尊今現在世轉正法輪亦是我昔初  
勸令發阿耨多羅三藐三菩提心行六波羅  
蜜者南西北方四維上下亦復如是善男子  
東方去此八十九億諸佛世界彼有世界名  
曰善華是中有佛號無垢功德光明王如來  
應正徧知明行足善逝世間解無上士調御  
丈夫天人師佛世尊今現在爲衆生說法彼  
佛亦是我昔所勸初發阿耨多羅三藐三菩  
提心令行檀波羅蜜乃至般若波羅蜜東方

復有妙樂世界是中有佛號阿闍如來復有  
閻浮世界是中有佛號日藏如來復有世界  
名樂自在是中有佛號樂自在音光明如來  
復有世界名曰安樂是中有佛號智日如來  
復有世界名勝功德是中有佛號龍自在如  
來復有世界名善相是中有佛號金剛稱如  
來復有世界名江海王是中有佛號光明如  
來復有世界名不愛樂是中有佛號日藏如  
來復有世界名離垢光明是中有佛號自在  
稱如來復有世界名山光明是中有佛號不  
可思議王如來復有世界名聚集是中有佛  
號大功德藏如來復有世界名華光明是中  
有佛號光明音相如來復有世界名安和熾  
盛是中有佛號安和自在見山王如來復有  
世界名善地是中有佛號知像如來復有世

界名曰華蓋是中有佛號眼淨無垢如來善男子如是東方無量無邊阿僧祇等現在諸佛爲諸衆生轉正法輪者未發無上菩提心時我初勸其令發阿耨多羅三藐三菩提心又復引導將至十方在在處處佛世尊所隨所至處修行安止檀波羅蜜乃至般若波羅蜜便得受阿耨多羅三藐三菩提記爾時東方善華世界無垢功德光明王佛師子之座及其大地六種震動有大光明雨於種種妙寶道華彼諸菩薩見是事已心生驚疑怪未曾有即白佛言世尊何因緣故如來之座如是震動我等昔來未曾見是其佛即告諸菩薩言善男子西方去此八十九億諸佛世界彼有國土名曰娑婆是中有佛號釋迦牟尼如來今現在爲四部衆說本緣法彼佛世尊

爲菩薩時初勸化我發阿耨多羅三藐三菩提心復引導我至諸佛所初令我行檀波羅蜜乃至般若波羅蜜我於爾時隨所至處即得初受阿耨多羅三藐三菩提記彼佛世尊釋迦牟尼即是我之真善知識今在西方處在大衆爲諸四部衆說本緣經是彼如來神足力故令我所坐師子座動善男子汝等今者誰能至彼娑婆世界問訊彼佛起居輕利時諸菩薩各白佛言世尊此善華世界諸菩薩等皆得神通於諸菩薩功德自在今日清旦見是大光其光悉從諸佛世界來至於此大地即時六種震動雨種種華見是事已有無量百千萬億諸菩薩等欲以神力往娑婆世界見釋迦牟尼佛供養恭敬尊重讚歎并欲諮受解了一切陀羅尼門然各不知娑婆世

界釋迦牟尼所在方面彼佛尋伸金色右臂於五指頭放於種種微妙光明其光即照八十九億諸佛國土至娑婆世界時諸菩薩因光得見娑婆世界有諸菩薩摩訶薩等充滿罽塞復有諸天龍神乾闥婆阿脩羅迦樓羅緊那羅摩睺羅伽等滿虛空中見是事已白佛言世尊我今已得見彼世界知其方面并見菩薩諸天人大眾彌滿其土間無空處釋迦如來復觀我等說微妙法彼佛告諸菩薩大士善男子釋迦如來恒以清淨無上佛眼徧觀一切無不見者善男子娑婆世界所有衆生在地處空一切皆言釋迦如來獨觀我心爲我說法善男子彼釋迦如來以一音聲爲諸種種異類說法衆生各各隨類得解不以異音爲多人說彼土衆生或事梵天見如

來身爲梵天像而得聞法若事魔天釋天日月毗沙門天毗樓勒叉毗樓博叉提頭賴吒摩醯首羅如是種類八萬四千隨其所事各見其像而得聞法生獨爲想是時會中有二菩薩一名羅睺電二名火光明爾時無垢功德光明王佛告二菩薩善男子汝今可往娑婆世界汝持我聲問訊釋迦牟尼世尊起居輕利氣力安不時二菩薩即白佛言世尊我見彼佛一切世界大眾雲集在地處空充滿罽塞其間無有空缺之處若我等往當住何處時佛告言諸善男子莫作是語言彼世界無止住處所以者何彼所住處寬博無邊彼佛所有無量功德不可思議以本願故悲心廣大乃令無量諸衆生類入於佛法受三歸依然後爲說三乘之法復說三戒示三脫門



復拔無量無邊衆生於三惡道安止令住三善道中善男子又一時中釋迦如來成無上道未久之間爲欲調伏諸衆生故在毗陀山因臺婆羅窟七日七夜結跏趺坐三昧正受入解脫樂佛身爾時徧滿是窟間無空處乃至四寸過七日已十方世界有十二那由他菩薩摩訶薩至娑婆世界住其山邊欲見釋迦牟尼如來供養恭敬尊重讚歎啓受妙法善男子爾時如來於所住處以大神足令其窟舍寬博無量悉得容受十二那由他菩薩摩訶薩諸菩薩等既得入已見其窟舍廣博嚴事有諸菩薩以師子遊戲自在神足供養於佛一一菩薩於化寶座而坐聽法善男子彼佛神力其事如是是諸菩薩得聞法已尋從座起頭面禮佛右繞三匝各各還歸本佛

世界其去未久窟還如故彼四天下第二天主釋提桓因名憍尸迦其命將終必定當墮畜生道中以是事故心生恐懼與八萬四千諸忉利天俱共來下詣因婆羅窟欲見如來時有夜又名曰王眼即其窟神在外而住爾時帝釋以佛力故作是思惟今我當使乾闥婆子般遮旬先至佛所以妙音聲讚詠如來當令世尊從三昧起善男子釋提桓因思惟是已即令乾闥婆子般遮旬彈瑠璃琴以微妙音其音別異有五百種以讚如來善男子是般遮旬當讚佛時爾時如來即復轉入相三昧中以三昧力故於此世界作大神力令諸夜叉羅刹乾闥婆阿脩羅迦樓羅緊那羅摩睺羅伽欲色界天悉來聚集其中若有喜聞妙音隨意得開心大歡喜或有喜聞讚歎

佛者聞讚歎已心生歡喜於如來所轉生尊重恭敬之心或有衆生喜聞樂音即得聞之聞已歡喜爾時釋迦牟尼如來尋從定起示諸大衆婆羅窟門釋提桓因尋至佛所頭面禮足却住一面向佛言世尊我於今者當坐何處時佛報曰憍尸迦汝之眷屬但入聚集我今當拓此婆羅窟令極寬博悉使容受此十二恒河沙等大衆眷屬皆令得坐爾時釋迦牟尼如來於大衆中以一妙音敷演正法令八萬四千諸根衆生隨所樂聞衆中或有學聲聞者聞聲聞法即有九十九億衆生得須陀洹果若有修學緣覺乘者即便得聞緣覺之法若有修學大乘法者純聞大乘乾闥婆子般遮旬等上首之衆十八那由他得不退轉於阿耨多羅三藐三菩提未發心者或

發無上菩提之心或發緣覺或發聲聞爾時釋提桓因恐怖即除增壽千歲得須陀洹果善男子釋迦如來以神力故能作如是廣博無邊說法音聲亦復如是亦無一人能尋彼佛音聲齊限彼佛方便無量無邊所化衆生無有能知如是方便善男子彼佛色身亦無量無邊無有人能得其身量見其頂者善男子如是大衆若欲得入彼佛腹中悉亦容受既入腹已復有欲得其腹邊者無有是處然如來腹亦不增減若衆生類皆共和合欲往來者於一毛中悉無罣礙乃至天眼亦無能得一毛孔邊然其毛孔亦不增不減彼佛世尊其身如是無量無邊善男子彼佛世界亦無量無邊善男子假使十方如一恒河沙等世界所有衆生入彼世界亦得容受何以故

彼佛初發菩提心時所作誓願無量無邊善男子置是一恒河沙等世界衆生乃至十方千恒沙等世界衆生入彼世界亦得容受如其本相不增不減善男子釋迦如來初發無上菩提心時欲得具足一切智故發大誓願是故今者所得世界無量無邊善男子釋迦牟尼以是四法諸佛世尊所不能及善男子汝今持此月光明無垢淨華往於西方如目所見娑婆世界并持我聲問訊彼佛起居輕利氣力安不爾時無垢功德光明王佛取月光無垢淨華與二菩薩而告之曰汝今乘我大神通力往彼世界爾時會中有二萬菩薩白佛言世尊如是如是我等今當乘佛神力往彼世界見釋迦如來供養恭敬尊重讚歎彼佛告曰善男子汝等宜知是時時二菩薩

與二萬大士乘佛神力發善華界一念之頃忽然來到娑婆世界耆闍崛山在如來前長跪叉手前白佛言世尊東方去此八十九億佛之世界彼有世界名曰善華是中有佛號無垢功德光明王佛今現在與諸菩薩摩訶薩等大衆圍繞讚歎世尊無量功德作如是言娑婆世界有釋迦牟尼如來今現在爲諸大衆轉正法輪彼佛世尊爲菩薩時初勸化我發菩提心以是因緣我於爾時尋得發於無上道心我發心已復勸修習六波羅蜜乃至如來以是四法諸佛世尊所不能及是故彼佛以此月光明無垢淨華供養世尊問訊如來起居輕利氣力安不善男子東方妙樂世界阿閼如來所坐之處師子之座亦六種動亦有無量諸大菩薩見是事已白佛言世

尊何因緣故如來所坐師子座處如是震動  
如上所說一切東方亦復如是爾時東方無  
量無邊阿僧祇等諸大菩薩皆來到此娑婆  
世界悉持月光明無垢淨華見佛供養恭敬  
尊重讚歎善男子如是東方無量諸佛皆遣

及十

十四

諸菩薩稱讚於我善男子我今見此南方去  
此世界過一恒河沙等諸佛國土彼有世界  
名離諸憂是有佛號無憂功德如來今現  
在說法復有世界名閻浮光明是有佛號  
法自在師子遊戲如來復有世界名安須彌  
是中有佛號道自在娑羅王如來復有世界  
名功德樓王是有佛號師子吼王如來復  
有世界名珍寶莊嚴是有佛號八臂勝雷  
如來復有世界名真珠光明徧照是有佛  
號珍寶藏功德吼如來復有世界名天月是

中有佛號火藏如來復有世界名梅檀根是  
中有佛號星宿稱如來復有世界名曰稱香  
是有佛號功德力娑羅王如來復有世界  
名曰善釋是有佛號妙音自在如來復有  
世界名頭蘭若是有佛號娑羅勝毗婆王

如來復有世界名月自在是有佛號光明  
自在如來復有世界名善雷音是有佛號  
妙音自在如來復有世界名寶和合是有佛號  
佛號寶掌龍王如來復有世界名垂寶樹是  
中有佛號雷音自在法月光明如來如是南  
方無量無邊阿僧祇等現在諸佛悉是我昔  
為菩薩時初可勸發菩提心者是諸世尊師  
子座處亦皆震動彼諸佛等亦各讚歎我之  
功德亦遣無量無邊阿僧祇等諸大菩薩持  
月光明無垢淨華悉來至此娑婆世界耆闍

及十

十五

崛山見佛禮拜供養恭敬尊重讚歎却坐一  
面次第聽法善男子我今復見西方去此七  
萬七千百千由旬佛之世界彼有世界名寂  
靜是中有佛號曰寶山今現在爲諸四衆說  
微妙法復有勝光無憂佛音智藏佛稱廣佛  
徧藏佛梵華佛勢進佛法燈勇佛勝音山佛  
稱音王佛梵音王佛如是西方無量無邊阿  
僧祇等諸佛世尊亦是我昔爲菩薩時初可  
勸發菩提心者是諸世尊師子之座亦皆震  
動彼諸佛等亦各讚歎我之功德亦遣無量  
無邊阿僧祇等諸大菩薩持月光明無垢寶  
華悉來至此娑婆世界耆闍崛山見佛禮拜  
供養恭敬尊重讚歎却坐一面次第聽法西  
北方去此百千那由他佛世界彼有世界名  
無垢是中有佛號離熱惱增毗沙門娑羅王

如來有二菩薩一名寶山二名光明觀復有  
壞諸魔佛娑羅王佛大力光明佛蓮華增佛  
栴檀佛彌樓王佛堅沉水佛大智大力佛如  
是無量諸佛如來乃至北方四維上下皆亦  
如是爾時釋迦牟尼如來以大神力爲欲容  
受如是衆故即一一變來會者身極令微細  
如葶藶子娑婆世界虛空及地彌滿罽塞間  
無空處乃至一毛時諸衆生各不相見亦復  
不見大小諸山須彌山王大小鐵圍二圍之  
中間幽冥之處及上諸天所有宮殿下至不  
見金剛地際唯除一人佛世尊也爾時釋迦  
牟尼如來復入徧虛空斷除諸法定意三昧  
令此無量月光淨華悉入一切身諸毛孔一  
切大衆皆悉自見爾時衆生都不憶念佛色  
身相唯見毛孔有妙園觀其園觀中有諸寶

及十

十六

樹其樹復有種種莖葉華果茂盛種種寶衣  
天幡幢蓋天冠寶飾真珠瓔珞所有莊嚴譬  
如西方安樂世界是諸大眾見是事已復作  
思惟今我當往遊觀彼園爾時唯除三惡衆  
生及無色天其餘所有一切大眾皆從毛孔  
入如來身處圍而坐爾時如來還捨神足時  
諸大眾各各還得如本相見各相謂言如來  
今者爲在何處爾時彌勒菩薩告諸大眾汝  
等當知我今與汝等悉在如來身分之中爾  
時大眾即見如來身之內外尋自覺知與無  
量大眾集聚共處如來身中復相謂言我等  
爲從何處得入誰將導我今入是中彌勒菩  
薩復告之曰諦聽諦聽如來今者現大神通  
變化之力復爲利益我等大眾將欲說法仁  
等今當一心專念爾時大眾聞是語已長跪

合掌受教而聽爾時世尊以一切行門而演  
說法何等名爲一切行門出生死淤泥入八  
聖道具足成就得一切智善男子有十專心  
發於菩提能入是門何等十一者欲令衆生  
悉得解脫迴向隨喜故二者發大悲心攝衆  
生故三者欲度未度精勤修治無上法船故  
四者欲解未解者莊嚴觀脫於虛妄顛倒故  
五者欲師子吼無所畏怖莊嚴觀於諸法性  
無我故六者欲隨所到一切世界心無分別  
善學諸法同十喻故七者欲得光明莊嚴世  
界修治戒聚令清淨故八者成就莊嚴如來  
十力具足一切波羅蜜故九者成就莊嚴四  
無所畏如說而作故十者莊嚴十八不共之  
法隨所聞法悉得無餘不放逸故是名十法  
專心發於無上菩提則能入是一切行門即

得不退無上菩提無相行門智道行門一切法無我心無思惟不生不滅是名菩薩不退轉地以是故非退非不退非斷非常非定非亂說是法時如來腹內八十億恒河沙等菩薩摩訶薩得不退轉於阿耨多羅三藐三菩提不可數菩薩摩訶薩得諸三昧甚深法忍悉從如來身毛孔出心大驚怪歎未曾有即於佛前頭面著地爲佛作禮起已忽然各還十方本佛世界復聞釋迦牟尼如來所演音聲過十方無量無邊阿僧祇等諸佛世界無諸障礙是諸菩薩雖還彼界續聞如來所演音教章句義味無所減少如在佛前近聽無異身亦如是徧諸十方無量世界亦有無量無邊阿僧祇菩薩聲聞亦見毛孔出入無礙如是第二乃至一切一一毛孔出入無礙十

方世界亦如是爾時大衆從釋迦牟尼如來毛孔中出頭面禮佛右繞三匝住於佛前以種種音義而讚歎佛爾時欲界色界諸天雨種種華塗香末香幢幡瓔珞微妙妓樂供養如來爾時會中有一菩薩名無畏等地長跪叉手前白佛言世尊如是大經當名何等云何奉持佛告無畏等地菩薩是經當名解了一切陀羅尼門亦名無量佛亦名大衆亦名授菩薩記亦名四無所畏出現於世亦名一切諸三昧門亦名示現諸佛世界亦名猶如大海亦名無量亦名大悲蓮華無畏等地菩薩摩訶薩復白佛言世尊若有善男子善女人受持是經讀誦通利爲他人說乃至一偈得幾所福佛告無畏等地菩薩我已先說所得福德今當爲汝更略說之善男子善女人

若有受持是經讀誦通利爲他人說乃至一  
偈於後五十歲中乃至有能書寫一偈所得  
功德勝諸菩薩十大劫中行六波羅蜜何以  
故諸天魔梵沙門婆羅門夜叉羅刹龍乾闥  
婆阿脩羅迦樓羅緊那羅摩睺羅伽拘辦荼  
餓鬼毗舍遮人及非人有瞋恚心者聞是經  
已即得清淨柔軟歡喜亦離諸病忿怒怨賊  
種種鬪諍消滅一切暴風惡雨病者得愈飢  
渴者得飽滿受諸快樂和合相順瞋恚之者  
能令忍辱怖畏者無所怖畏受諸歡樂有煩  
惱者令離煩惱能令善根一切增長能拔惡  
道所有衆生能示三乘出要之路能得甚深  
法忍三昧陀羅尼門能與衆生作大利益能  
坐道場金剛之座能破四魔能示一切助苦  
提法能轉法輪無聖財者能令具足能令無

及十

十九

量無邊衆生入無畏城以是因緣能持此經  
讀誦通利爲他人說乃至一偈若後末世五  
十歲中乃至有能書寫一偈得如是等無量  
無邊福德之聚是故我今說如是經如是大  
經當付囑誰誰能於後五十歲中護持是法  
誰能與諸在在處處不退菩薩宣說令聞誰  
復能爲行非法欲惡貪邪見不信善惡有果  
報者演布是教爾時大衆皆知佛心於時有  
一大仙夜又名無怨沸宿坐於衆中爾時彌  
勒菩薩摩訶薩即從座起將是夜又至於佛  
所是時如來告是夜又大仙汝今當受是經  
乃至末後五十歲中爲不退菩薩乃至不信  
善惡報者演布是教爾時夜叉即白佛言我  
於過去八十四大劫中以本願故作仙夜叉  
修行阿耨多羅三藐三菩提爾時教化無量



無邊阿僧祇人安止於四無量心復令無量  
 無邊衆生不退轉於阿耨多羅三藐三菩提  
 世尊我今當爲未來之世一切衆生作擁護  
 故於後末世五十歲中受持是經乃至從他  
 聞四句偈要當讀誦悉令通利流布與人令  
 不斷絕佛說是經已及十寂意菩薩諸天大衆乾  
 闥婆等人及非人皆大歡喜頭面作禮退坐  
 而去

### 悲華經卷第十

#### 音釋

咄當沒切咨嗟語也 唼子合切鷓鴣鷓赤脂切 鷓鴣呼亮切 鷓鴣也